

АКАФИСТ СВЯТОМУ АПОСТОЛУ АНДРЕЮ ПЕРВОЗВАННОМУ

Кондак 1

Первозванного апостола Христо́ва, / Евáнгелия свята́го проповедника, / Ру́сския страны богодухновеннаго просветителя / Андрея преславнаго, песньми восхвалим, / стояще на версе холма, идеже Крест водрузи десница его, / и ему, яко Церкви возследователю верховному, / в след себе указавшему ей путь ко Христу, во умилéнии воззовём: // Радуйся, Андрее, апостоле Христов Первозва́нный.

Икос 1

Ангел благовестник Агнца Христа, вземлющаго грехи мира, был еси Андрее апостоле, и с Ним во веки пребываеши на Небеси; отонудуже и призри на пения, приносимая тебе во храме твоём, на месте, идеже стоясте нозе твои, и, яко богат сый благодатию Божиею, подаждь нам слово благо, да зовем ти:

Радуйся, деннице от града Вифсаиды нам возсиявшая; Радуйся, равночестный брате верховнаго Петра.

Радуйся, учениче великаго Предтечи Христова; радуйся первее прочих апостол званный ко апостольскому служению от Самаго Господа.

Радуйся, яко и другим с радостию воззвал еси: “Приидите, обретохом желаемаго Мессию”; Радуйся, и нас к Нему же приводяй.

Радуйся, Андрее, / апостоле Христов Первозванный.

Кондак 2

Учителю, где живеши? — вопросил еси, Андрее, Спаса душ наших и, с Ним пребыв день един, возлюбил еси на все дни живота твоего обретеннаго тобою Мессию, и брата твоего старейшаго привел еси к Нему. Темже и нас, яко меньшую братию твою, к Нему же не престай влещи, да и мы, последующе стопам твоим, вопием Богу: Аллилуиа.

Икос 2

Провидя в тебе, святой Андрее, веры и любви пламень, Господь паки ты обрете на озере Геннисаретсте, яко рыбака, купно с братом твоим, вмещающа мрежи во глубину, и рече вама: “Грядита по Мне, и Аз сотворю вы ловца человеком”. Ты же абие последовал еси Ему и богодухновенным словом, яко мрежею, человеки уловил еси Христу, с нимиже и мы уловеннии тобою во спасение, вещаем ти:

“Радуйся, яко от Самого Господа ловитве духовней научился еси; Радуйся, яко на том же озере с прочими апостолами обуреваем быв, верою спаслся еси в Господа, запрещающего ветром и морю.

Радуйся, стяжавый велию веру, егда видел еси пречудное насыщение пяти тысяч пятию хлебами; Радуйся, дар приявый от Господа целити всяк недуг и всяку болезнь.

Радуйся, яко глас с небесе слышан бысть елином, Христа тобою узревшим; Радуйся, яко на горе Елеонстей откровена быша и тебе грядущая при кончине мира.

Радуйся, Андрее, апостоле Христов Первозванный.

Кондак 3

Странствия Владычня и Безсмертныя Трапезы на Горнем месте Сиона насладився, яко верный друг Христов, вкупе с прочими апостолами узрел еси Господа и Бога твоего, от Негоже и Дух Свят приял еси, во еже вязати и решити грехи людския. И паки, в тойжде горнице Сионстей, обильное бысть на тя изливание обетованнаго Духа во огненных языцех. Темже вся племена удивишася, како языком их глаголал еси величия Божия, поя: Аллилуиа.

Икос 3

От Господа заповедь примим проповедати Евангелие всей твари, обтекл еси многая грады и страны, апостоле Андрее, призывая люди к познанию Истиннаго Бога и крестя их во имя Отца и Сына и Святаго Духа; с нимиже и мы сподобихомся благодати Крещения. Сего ради благодарственная воспоем ти:

Радуйся, чудес Христовых провозвестниче верный; **Радуйся**, Святаго Евангелия проповедниче громогласный.

Радуйся, идольскаго служения потребителю; **Радуйся**, истиннаго благочестия насадителю.

Радуйся яко по слову твоему людие водою и Духом возрождаются; **Радуйся**, яко тобою вернии Безсмертныя Трапезы причащаются.

Радуйся, Андрее, апостоле Христов Первозванный.

Кондак 4

Сила Божия осени тя, апостоле Первозванный, во еже благовестити силу и славу Сына Божия и утверждати вся веровати во Святую Троицу призванныя. Темже убо и нас, поклоняющихся Единому в Трех Ипостасех Богу, на злачней пажити веры Христовы соблюди, да благодатию Святаго Духа выну освящаемии, велегласно поем Ему: Аллилуиа.

Икос 4

Привед ко Христу брата своего Симона Петра, Первозванне, с ним изшел еси и на апостольское служение твое, первее во Антиохию и Синоп, тамо победив демонов полки, от уз темничных спутника твоего апостола Матфия свободил еси, и юзники с ним бывшия крестил, верховному Петру оттуду в западныя страны текущу, ты братнее целование дал еси ему, сам же добре подвизался еси на востоцех. Темже и мы, людие Церкви Восточныя, блажим тя:

Радуйся, сило Божия, полки демонов прогоняющая и узы темниц сокрушающая; **Радуйся**, приятелище благодати апостольския, от адовых уз тайнодейственне нас свободяющая.

Радуйся запад и восток с братом твоим богомудрым, проповеди ради слова Божия, жребием разделивый; **Радуйся**, во граде Синопе неверие иудеев силою чудес твоих обличивый.

Радуйся яко тамо от безбожных Христа ради биен был еси; **Радуйся**, яко от Самаго явльшагося ти Господа исцеление язв тебе даровася.

Радуйся, Андрее, апостоле Христов Первозванный.

Кондак 5

Двукраты возвращая во святыи град, да купно со апостолами пятидесятидневный день празднуеши тамо, двукраты паки шествовал еси от святого Сиона, во еже Христа проповедати вселенней, первее со Иоанном наперсником Господним, посем же с Симоном Кананитом и Матфием, иже жребием назнаменован бысть во апостола, и вся пределы Асии и Понта обтекл еси, словом спасения всех оглашая, да Богу поют: Аллилуиа.

Икос 5

От моря Галилейскаго до Понта Евксинскаго апостольския мрежи твоя распротрый и все поморие окрест огласивый благовестием твоим, востекл еси, Первозванне, и в страны Скифии, Крест Христов всюду водружая в знамение нашего спасения. Сего ради и мы, аще и позднии роди, внемлюще благовестию твоему и воспоминающе подвиги твоя, зовем ти:

Радуйся, в Никеи лютыя разбойники укротивый и лютейшаго дракона умертвивый; **Радуйся**, Крест Христов посреде града сего водрузивый, яко Предтеча сый двукраты собранных тамо отец богоносных.

Радуйся, яко во Асии и Понте тобою свет Христов возсия; **Радуйся**, яко апостольский жезл твой предгорие Кавкаса свету Христову отверзе.

Радуйся, имже мрак киммерийский озарися; **Радуйся**, имже вселенная струями воды живы напоися.

Радуйся, Андрее, апостоле Христов Первозванный.

Кондак 6

Бурею страстей одержимая и, яко воды океана, волнуемая, племена человеков, яже не ведяху Бога Истиннаго, привел еси, апостоле, к тихому пристанищу Христову и тех сердца, аки утлюю ладью неверием обуреваемая, на якори веры православныя утвердил еси.

Темже и мы, яко чада православныя веры, благодарным сердцем и благодарными усты вопием Богу: Аллилуиа.

Икос 6

На горе Елеонстей Божественного Учителя твоего иногда со прочими апостолы спросил еси, Андрее: “Рцы нам, что есть знамение пришествия Твоего?” На горах же Киевских, яко орган сый благодати Духа Святаго, ты предвозвестил еси грядущую славу места сего; мы же, предреченныя на милости сея сподобльшися, умиленно взываем ти:

Радуйся, яко с горы Сиона закон нам евангельский принесл еси; **Радуйся**, яко по водам Ворисфена апостол Божий к нам востекл еси.

Радуйся, благодать Иорданову, Крещения нашего ради, реце сей даровавый; **Радуйся**, на горах Киевских Крест нашего спасения водрузивый.

Радуйся, имже обильное изливание благодати Божией zde предречется; **Радуйся**, имже бытие града велика и церковей многих zde предвозвестися.

Радуйся, Андрее, апостоле Христов Первозванный.

Кондак 7

Днесь, во исполнение пророческаго гласа твоего, храм преславный красуется на месте, идеже не сущая яко сущая провидел еси по дару Духа Святаго; окрест же его град велий с церквами златоверхими истину словес твоих свидетельствует, емуже и доньне ты, яко с горния кафедры, мир благовествуеши. Темже и мы, сбытие богодухновенных глагол твоих зряще, велиим гласом взываем Богу: Аллилуиа.

Икос 7

От светоносныя зари, Первозваннаго апостола свет боговедения восприимши, святая Ольга возсия Русской земли яко денница нашего спасения, возводя вслед себе, яко светозарное светило,

внука своего Владимира, просветителя всея полунощныя страны. Темже и мы, возведше очи наша к тебе, Андрее богомудре, яко к начальному благовестнику нашего спасения, восписуем ти похвальная сия:

Радуйся, яко деннице нашего спасения, Ольге святей, света Божественнаго познание даровася; **Радуйся**, яко благоверию ея Христова Царствие отверзеса.

Радуйся, яко благословением твоим преславное светило от сея денницы нам произыде; **Радуйся**, яко по твоему предвозвестию апостольскому равноапостольный князь нам явися.

Радуйся, яко тобою святого Владимира царствие земное к Небесному приобщися; **Радуйся**, яко Днепр и Почайна, реки Киевския, спасительною купелию нам быша.

Радуйся, Андрее, апостоле Христов Первозванный.

Кондак 8

Проповедуют преславного града Киева и всея Русския страны пастырие и пасомии память деяний твоих, богомудре Андрее апостоле; в недрах же пещерных нетленно почивающии угодницы Божии, со Антонием и Феодосием, немолчными усты, яко живи суще, славу твою веком и родом возглашают, тобою бо водруженный zde Крест, яко благосеннолиственное древо, произрасте, во еже изнести нам плоды благочестия и святыни. Мы же райскаго вертограда твоего, аки птенцы духовнии, тобою научени есмы воспевати Богу: Аллилуиа.

Икос 8

Не точию Руси единыя был еси спасения провозвестник, Первозванный апостоле Христов, но и вся словенская племена, якоже кокош, птенцы своя под криле собираяй, привел еси я ко Христу; ты бо от Херсониса во мрак полунощныя страны презирая, сущим тамо людем, да Божию научатся слову, премудрыя учителя, Кирилла и Мефодия, проповедию твоею за многие веки предуготовал еси; мы же, аки устами сих просветителей наших, велегласно вопием ти:

Радуйся, словенская племена искони благословивый; **Радуйся**, слово их разумное словом Божиим умудривый.

Радуйся, яко глаголу Божию послушливии, Церкви чада словесная быша; **Радуйся**, яко в Херсонисе, идеже проповедал еси, первая русская писмена Кирилл святой обрете и прият я.

Радуйся, яко теми Алфу и Омегу, начаток и конец — Христа Божию премудрость возвестил еси им; **Радуйся**, яко и вся богодухновенная писания учителие сии на язык словенск нам преложиша.

Радуйся, Андрее, апостоле Христов Первозванный.

Кондак 9

Пустынный Скифии не убоявся, во глубину полунощных страны, простерл еси апостольская странствия твоя, Первозванне, отонудуже и в ветхий Рим пришел еси, иже тогда глава миру языческому бысть; обаче тьмы ради идольския оставль его, и на красный брег Воспора пришед, тамо во граде Византии, иже новый Рим и мать христианом бысть, апостольский престол твой утвердил еси. да от него Восток и Север весь светом веры озарится, вернии же чада Церкви Христовы Богу единомысленно зовут: Аллилуиа.

Икос 9

Мати Сион — псаломски речет человек, яко человек духовно родися в нем, новый же Сион нам бысть Киев: в нем бо свет и благодать Божия явися всем сыновом русским от кафедры, юже ты, Первозванне апостоле, в Византии утвердил еси. Темже и мы, Невечерним Светом озаряемии, благодарне взываем ти:

Радуйся, от горы Сионския снисшедый и горним светом Киев многохолмный озаривый; **Радуйся**, граду сему многоплодие духовное благословением твоим ниспославый.

Радуйся, яко посреде вселенных апостольский престол твой утвердил еси; **Радуйся**, яко под сень его (в новом Риме) вся просвещенная тобою языки собрал еси.

Радуйся, имже православие в душах их утверждается; **Радуйся**, имже от Востока тьма Запада отревается.

Радуйся, Андрее, апостоле Христов Первозванный.

Кондак 10

Егда наста время преставления твоего, блаженне апостоле, в древния Патры Ахайския пришел еси, да тамо жрен будеши, течение бо скончал еси, подвигом добрым подвизался еси, всем проповедав Христа распята, иудеем соблазн, еллином же безумие, нам же, званным и спасаемым, — Христа, Божию Силу и Божию Премудрость, от Неяже и научихомся пети Богу: Аллилуиа.

Икос 10

Всюду именем Господа Иисуса болящия исцеляя, мертвыя воскрешая, бесы изгоняя, и во Патрах предсмертную проповедь твою чудесами утвердил еси, апостоле Христов, и анфипата Лезвия обратил еси к познанию истины, егда противления ради язвою поражен быв, тобою от одра болезни воздвиген бысть; людие же вси, видевше в тебе силу Божию, идолы своя сокрушиша, посем и Господь явился тебе, якоже Павлу иногда в Коринфе, и повеле взяти Крест твой, назнаменовав сим твое в Патрах, Его ради, страдание. Темже и мы, дивящися велией благодати в тебе, благоговейно взываем:

Радуйся, велия Бога всемогущаго сило; **Радуйся**, многоценное чудес сокровище.

Радуйся, древних Патр просвещение и украшение; **Радуйся**, неверие анфипата в веру пременивый.

Радуйся, яко тамо паки явился тебе Господь, на подвиг крестный тя призывавый; **Радуйся**, яко уготовася тебе венец правды.

Радуйся, Андрее, апостоле Христов Первозванный.

Кондак 11

Нерон кесарь, якоже иногда Ирод, гонения на вся верныя воздвигнувый, в Риме Павла мечем усекну, Петра же на кресте распя, по-

добне и тебе достиже в Патрах рука мучителява, егда вместо кроткаго Лезвия судию постави Егеата лютаго, иже не терпий крещения брата своего, ниже исцелением жены своея умягчен быв, в темницу вверже тя и, якоже верховного Петра, на крест осуди. Ты же юзник сый, в темнице мрачней, яко во светлом храме, брата анфипатова Стратоклиса во епископа Патром проручествовал еси, Богу со всеми верными посреде узилища воспевая: Аллилуиа.

Икос 11

На месте лобнем крест воздвигаем узрев, на немже имел еси распят быти, не убоялся еси, апостоле, даже до смерти свидетельствовати возлюбльшаго тя и возлюбленнаго тобою Христа, и к сему знамению спасения руце простирая, умиленно взывал еси:

Радуйся, Кресте Всечестный, пред нимже с веселием предстою, ведая тя, упование мое; **Радуйся**, Кресте Животворящий, егоже глава до Небес достиже, подножие же врата ада сокруши.

Радуйся, Кресте достопокланяемый, восприемый Владыку моего, яко гроздие сладчайшее, источившее нам спасение; **Радуйся**, Кресте благословенный, разбойника спасый и тому плоды исповедания даровавый.

Радуйся, яко и моя радости исполнение был еси; темже радуйся и ты, страстотерпче, на Кресте веру твою во Христа запечатлевый.

Радуйся, Андрее, апостоле Христов Первозванный.

Кондак 12

Приидите, свидетелие радости моя! — воззвал еси апостоле к совершителем воли Егеата, — творите волю над мною, распните мя и, яко агнца, принесите в жертву создавшему мя Творцу. И сия рек, возшел еси на крест, яко на горнюю кафедру, с неяже три дни и три нощи проповедал еси слово Божие окрест стоящим людям, да не боятся смерти, исповедающе Господа Иисуса. Егда же светом небесным озарися лик твой, ужасеся мучитель и тя со креста взяти

повеле; обаче ты, страстотерпче, не восхотел еси от крестных мук разрешитися, до исхода твоего непрестанно Богу вопия: Аллилуиа.

Икос 12

Славяще апостольския подвиги твоя, Андрее Первозванне ублажаем святую кончину твою, еюже Живоносную Страсть Сына Божия прославил еси, и во умилении сердца взываем ти сице:

Радуйся, друже Христов, с радостию крестная страдания за Него претерпевый; Радуйся, апостоле верный, со креста глаголы Живота Вечного людям проповедавый.

Радуйся, яко в час снятия со креста осени тя свет, аки молния с небесе; Радуйся, аки православно исповедающим проповеданного тобою Христа Сына Божия обещал еси благодать велию.

Радуйся, Горняго Иерусалима апостольское основание; Радуйся, седяй со апостолы на едином от двоюнадесяте престолов, во еже судити вся колена Израилева.

Радуйся, Андрее, апостоле Христов Первозванный.

Кондак 13

О Первозванный апостоле Христов Андрее, призри на благохваления сия всех чтущих святую память твою, и яко водрузил еси Крестное Древо на горах града Киева, присно осеняй и нас спасительным знамением сим, да, Крестом Господа Бога и Спаса нашего охраняеми, достигнем в меру возраста исполнения Христова и сподобимся с тобою и со всеми святыми, во гласе радования, в безконечныя веки пети Богу, Спасителю нашему: Аллилуиа. **Трижды.**

Икос 1

Ангел благовестник Агнца Христа, вземлющаго грехи мира, был еси Андрее апостоле, и с Ним во веки пребываеши на Небеси; отонудуже и призри на пения, приносима тебе во храме твоём, на месте, идеже стоясте нозе твои, и, яко богат сый благодатию Божиею, подаждь нам слово благо, да зовем ти:

Радуйся, деннице от града Вифсаиды нам возсиявшая; **Радуйся**, равночестный брате верховнаго Петра.

Радуйся, учениче великаго Предтечи Христова; радуйся первее прочих апостол званный ко апостольскому служению от Самаго Господа.

Радуйся, яко и другим с радостию воззвал еси: “Приидите, обретохом желаемого Мессию”; **Радуйся**, и нас к Нему же приводяй.

Радуйся, Андрее,/ апостоле Христов Первозванный.

Кондак 1

Первозванного апостола Христова,/ Евангелия святого проповедника,/ Русския страны богодухновеннаго просветителя/ Андрея преславнаго, песньми восхвалим,/ стояще на версе холма, идеже Крест водрузи десница его,/ и ему, яко Церкви возследователю верховному,/ в след себе указавшему ей путь ко Христу, во умилении воззовем:// **Радуйся**, Андрее, апостоле Христов Первозванный.

Святой апостоле Андрее, моли Бога о нас.

Молитва апостолу Андрею Первозванному

Первозванне апостоле Бога и Спаса нашего Иисуса Христа, Церкви последователю верховный, всехвальне Андрее, славим и величаем апостольским труды твоя, сладце поминаем твое благословенное к нам пришествие, ублажаем честная страдания твоя, яже за Христа претерпел еси, лобызаем священные мощи твоя, чтим святую память твою и веруем, яко жив Господь, жива же и душа твоя и с Ним во веки пребываеши на Небеси, идеже и любиши ны тоюжде любовью, еюже возлюбил еси нас, егда Духом Святым прозрел еси наше еже ко Христу обращение, и не точию любиши, но и молиши о нас Бога, зря во Свете Его вся нужды наша. Тако веруем и тако сию веру нашу исповедуем во храме, иже во имя твое, святой Андрее, преславно создася, идеже святые мощи твоя почивают; верующе же, просим и молим Господа и Бога и Спаса нашего Иисуса Христа, да молитвами твоими, яже присно послушает и приемлет, подаст нам вся потребная ко спасению нас грешных; да якоже ты абие по

гласу Господа, оставь мрежи своя, неуклонно ему последовал еси, сице и кийждо от нас да ищет не своих си, но еже к созиданию ближняго и о горнем звании да помышляет. Имуще же ты предста-теля и молитвенника о нас, уповаем, яко молитва моя много может пред Господем и Спасителем нашим Иисусом Христом, Емуже подобает всякая слава, честь и поклонение со Отцем и Святым Духом во веки веков. Аминь.

Тропарь св. ап. Андрею Первозванному, глас 4

Яко апостолов первозванный/ и верховнаго сущий брат,/ Владыце всех, Андрее,/ молися, мир вселенней даровати// и душам нашим велию милость.

Кондак, глас 2

Мужества тезоименитаго богоглагольника/ и Церкви воз-следователя верховнаго,/ Петро́ва сродника восхва́лим:/ зане́ якоже древле сему, и ныне нам воззва́:// приидите, обрето́хом Желáемаго́.

Величание апостола Андрея Первозванного:

Велича́ем тя,/ апо́столе Христов Андрее/ и чтим болезни и́ труды́ тво́я,/ и́миже трудился еси́// во благовѣстии Хри-сто́ве.